



Komunikado for di Tourism Corporation Bonaire

Pa mas informashon tokante komunikado por tuma kontakto ku Ronella Tjin Asjoe-Croes, Direktor di TCB na (599) 717-8322 òf por manda un e-mail na gm@tourismbonaire.com.

Kralendijk, 26 di Mei 2008

**MINISTER TJIN ASJOE LO TA ASISTIENDO NA REUNION DI URGENSIA;
AEROLINEA NAN FOR DI MERKA KU MEDIDA MAS SEVERO PA ATENDÉ
SUBIDA KONTINUO DEN PREIS DI GASOLIN**

Manera ta konosí kaba, e subida di preis di gasolin tin su efekto negativo den diferente industrianan, inkluso esun di aviashon / turismo. Den e diferente merkadonan di importansia pa Boneiru; Merka, Europa i Sur Amérika nos por nota e konsekuensianan. Den e merkado merikano por nota ku gastunan operashonal pa ku aviashon a subi ku 40 porshento, kousando pèrdida masal ku al final a resultá den vários bankarota, kual tendensia ta kontinuando.

Resientemente islanan den Karibe a ser informá ku e aerolinea nan ku ta brinda konekshonnan for di Merka lo bai tuma medida nan mas severo pa asina atendé subida kontinuo di preis di gasolin. Karibe, pa medio di Caribbean Tourism Organization (CTO), a ser alerta di diferente medidanan drástiko na kaminda e.o. ku lo kanselá servisionan aéreo riba rutanen ku no tin suficiente okupashon, pues ku no ta duna e rendimentu nesario i ku tambe lo saka avion bieu ku ta usa mas gasolin for di sirkulashon. Pa ku e servisionan aéreo ku lo kontinuá, aerolinea nan lo hisa preis nan di ticket.

TCB ta den kontakto kontinuo ku su partnernan aéreo i despues di a risibí e alerta aki a tuma kontakto un bes ku e aerolinea nan ku ta sirbi Boneiru for di Merka. Boneiru su buelo nan di Continental Airlines, Delta Airlines i American Eagle ta konta ku bon okupashon. Konversashonnan preliminarario ta indiká ku efektonan pa Boneiru lo ta mínimo. TCB ta den negoshashon ku aerolinea nan pa asina determiná efektonan i por tuma e akshonnan nesario.

Den kuadro di e akontesimentu aki CTO tambe a yama un reunion di urgensia destiná pa Ministernan i Diputadonan pa trata e situashon aéreo pa Karibe. Minister di Ekonomia i Labor Sr. Elvis Tjin Asjoe lo ta representando Boneiru na e reunion aki ku lo tuma lugá 29 di mei na Antigua. Sr. Tjin Asjoe lo wòrdu kompania pa Sra. Candice Kimmel di TCB Norte Amérika.

TCB lo tuma e pasonan nesario pa asina garantisá e kapasidat aéreo adekuá pa e merkado Norte Amerikano ku a mostra un kresementu di 19.4% na 2007. Un kresementu ku pa gran parti ta debí na un kapasidat aéreo mas fuerte ku otro añanan.